

## VIJESTI VIJESTI VIJESTI

### "MIMI" PONOSNA ŠTO JE BOSANKA

Početak februara teniserka Jasmina Tinjić ponovo je zablistala u Francuskoj. Grad Tarbes bio je domaćin nezvaničnog Svjetskog prvenstva do 14 godina, a nakon skoro godinu pauze, mlada Tuzlanka je odličnim igrama ponovo skrenula pažnju na sebe. - Prezadovoljna sam plasmanom u polufinale prestižnog Mastersa.



Posebno sam ponosna jer sam, kao Bosanka, ostvarila ovaj uspjeh – kaže mlada Tinjić. Međutim, zbog nebrige u Tuzli prema ovom teniskom biseru, Jasmina je sa svojim roditeljima i bratom prije četiri godine preselila u Split, gdje je, uz vrhunske trenere, počela evropski uspon.

Uvijek nasmijana "Mimi", kad god joj to obaveze dozvole, rado obilazi svoj matični klub Zmaj od Bosne i svog prvog trenera Ramiza Delića Baru, koji je, uz njenog oca Jusufa, i najzaslužniji za to što je Jasmina već kao 12-godišnjakinja bila među četiri igracice u Evropi.

U narednom periodu Jasminu očekuje niz kvalitetnih turnira, a u planu je učešće i na Orange bowlu. Do tog Mastersa, koji je jedan od najjačih u svijetu, Tinjić će učestvovati na turnirima prvog i drugog ranga do 18 godina.

### ŠABOVIĆ I ČALUK POBJEDNICE U ZAGREBU

Na četvrtom pozivnom teniskom turniru "Zagreb Open 2004", na kome su nastupile 34 djevojčice uzrasta do 10 godina, dvije članice Teniskog kluba "Kameni dvorac" iz Kaknja Arnela Šabović (10) i Nerma Čaluk (9) postigle su veliki uspjeh.

Ove mlade i izuzetno talentirane teniserke postigle su po pet pobjeda i stigle do finala, gdje je nešto iskusnija Arnela Šabović pobijedila svoju klupsku saigračicu sa 7:5.


- U svom prvom internacionalnom nastupu naše mlade igracice potvrdile su svoj talent i postigle veliki uspjeh, koji, uistinu, predstavlja mali podvig – kaže trener Nedžad Helač.

Arnela Šabović i Nerma Čaluk spadaju među najtalentiranije teniserke u Bosni i Hercegovini i pred njima je velika budućnost. Podvig na "Zagreb Openu 2004" sigurno nije slučajna, jer su ove dvije mlade teniserke ove godine osvojile i dosta domaćih trofeja.

### POTVRDITI KVALITET I NA MEĐUNARODNOJ SCENI

Ina Hadžiselimović spada među najperspektivnije bh. teniserke. Nanedavno održanom Državnom dvoranskom prvenstvu u Banjoj Luci ova 17-godišnjakinja, inače članica Teniskog kluba PSV iz Sarajeva, osvojila je titulu prvaka, izgubivši samo jedan set u tri odigrana meča. Narednog mjeseca Hadžiselimović će učestvovati na nekoliko turnira u seniorskoj konkurenciji u Hrvatskoj. - Želim vidjeti gdje mi je mjesto


na međunarodnoj sceni. Radi se o turnirima nagradnih fondova do 10.000 dolara – kaže mlada teniserka.



Hadžiselimović nije bez internacionalnog iskustva. Ne tako davno osvojila je drugo mjesto na Orange bowlu u Sjedinjenim Američkim Državama u konkurenciji do 12 godina, na takmičenju koji mnogi u teniskom sportu nazivaju nezvaničnim prvenstvom svijeta za mlade kategorije.

- Na turniru u Švicarskoj prije tri godine bez problema je savladala Anu Ivanović iz Srbije

nastavak na 37. str



Gore, koja sada igra i na najvećim turnirima. Međutim, nakon toga, napravila je pauzu od dvije godine, što je ostavilo traga na njezinom teniskom razvoju – riječi se Vedrana Bjeljica, trenera i direktora PSV-a.

Hadžiselimović i Mahdi Bešović, još jedna nadarena bh. igračica, dobile su poziv od Njemačke teniske federacije da tokom maja i juna borave i treniraju u Njimegenu, gdje bi nastupale i na sedam jakih turnira. Također, Hadžiselimović je jedina naša igračica koja je potpisala ugovor s Babolatom, poznatim francuskim proizvođačem teniske opreme.

### NA ULICI IZLOŽIO KĆERKINE TROFEJE

U centru Orašja, na Keju Alije Alijagića, jučer prijepodne nezadovoljni Ivo Martinović, otac 25-godišnje bh. teniserke Sandre Martinović, izložio je dio kolekcije njenih osvojenih trofeja u profesionalnoj karijeri.

To je učinio u znak protesta što političari od općinskog, kantonalnog do državnog nivoa Sandri već godinama ne daju, kako on kaže, nijedan fening za sportsko napredovanje.

- Punih šest godina nisu joj dali ni pare. U tom razdoblju sudjelovala je na više od 150 teniskih turnira diljem svijeta i to pod zastavom naše zemlje. Godinama nailazimo na nerazumijevanje od najnižih do najviših dužnosnika. Ne žele me primiti, a svake godine uporno šaljem zahtjeve za pomoć Kantonu i Općini Orašje. Kada dođem upitati šta je sa njima, svi bježe od mene kao od nekog ubojice, a neki me čak i ismijavaju – kaže vidno revoltirani Martinović.

### NEIRA FATIĆ

Početak ovogodišnje teniske sezone, mladoj teniserki Neiri Fatić iz TK Junior iz Hadžića, neće ostati u dobrom sjećanju. Na povratku iz škole ledom pokrivena ulica bila je uzrok pada i povrede. Slomljen zub i ruka, sigurno će, nadamo se na kratko, zaustaviti napredovanje ove talentirane teniserke. Nadamo se i želimo brzo ozdravljenje.



# SELMA BABIĆ

Pripremio: Kenan Maličbegović

Selma Babić rođena 21.07.1988. učenica je 2. razreda medicinske škole.

Rezultati u 2004. godini:

- Prvak BiH u kategorijama 16, 18, i seniori (na Državnim prvenstvima u Zenici, Banja Luci i Doboju)
- 4 osvojena ETA turnira do 16 godina u singlu (Zenica, Čakovec, Kranj i Sarajevo)
- 3 osvojena ETA turnira do 16 godina u parovima (Zenica, Čakovec i Sarajevo)
- odigrala 2 ITF turnira do 18 godina (jedan osvojila u Mostaru, a na drugom izgubila u četvrtfinalu također u Mostaru)
- na Otvorenom prvenstvu Brčkog za seniore (nagradni fond 11.000 KM) osvojila 2. mjesto
- na mastersu najboljih juniorki u Europi do 16 godina osvojila 3. mjesto (Masters se igrao u Italiji) čime je zvanično završila prošlu godinu kao 3. u Europi
- igrala za FED CUP reprezentaciju BiH
- višegodišnji je član juniorskih selekcija BiH
- ploglašena za sportistkinju Opštine Zenica i ZE-DO kantona za 2004. godinu

Dosadašnji rezultati u 2005. godini:

- Državno prvenstvo do 18 .godina u Banja Luci - 3. mjesto
- Državno seniorsko prvenstvo u Širokom Brijegu - 1. mjesto

O planovima - trener Kenan Maličbegović:

- Ove godine Selma ima u planu odigrati 15 međunarodnih turnira (8 ITF do 18 godina i 7 WTA turnira 10,000 \$). Selma i ja smo postavili visoke ciljeve za naredne dvije godine (plasman među 80 igračica na ITF rang listi do 18 godina što bi joj omogućilo učešće na juniorskim Grand Slam turnirima, plasman na WTA rang listi...). Selma je dosta unaprijedila svoju igru u zadnjih 6 mjeseci (što pokazuju i rezultati) tako da očekujemo puno od ove sezone. Selmin trenazni rad je pod mojim punim nadzorom, a na fizičkoj pripremi radi Munir Selimović.



### LAUREATI SELMA BABIĆ I SENAID HASIĆ

Teniserka Selma Babić, članica TK Čelik, i atletičar Senaid Hasić, član AK Zenica, najbolji su sportisti Općine Zenica za 2004. godinu, u izboru Sportskog saveza Zenice.

Osim Selme Babić i Senaida Hasića, u konkurenciji najuspješniji sportisti za seniore i seniorke nagrađeni su i Esad Durmišević i Nedžad Salkić (oba sjedeća odbojka, članovi IOK Zenica 92), Ivan Laikert (boks, BK Čelik), Maja Lokmić (košarka, ŽKK Čelik Biss Tours), Mirsad Kopic (rukomet, RK Čelik), Denis Brdarević i Đana Salčinović (karate, KK Hasen Do) te Elvis Jahić (biciklizam, BK Zenica Metalno). Najuspješniji u konkurenciji juniora i juniorki su: Igor Laikert (skijanje, SKI klub Zenica), Mirza Dizdarević (stoni tenis, STK Mladost), Armin Dajić (tenis, TK Čelik), Aida Pilav (košarka, ŽKK Čelik B.T.), Hanisa Ahmić (karate, Hasen Do) i Sanela Salkić (plivanje, PK Željezara).